



SIARAN MEDIA

KEMENTERIAN BELIA DAN SUKAN



KBS : 76/2024

TIMBALAN MENTERI BELIA DAN SUKAN RAI LEBIH 200 GRADUAN MUDA TVET DI ISTIADAT KONVOKESYEN IKBN MIRI KE-16 2024

1. YB Adam Adli, Timbalan Menteri Belia dan Sukan merasmikan Istiadat Konvokesyen Institut Kemahiran Belia Negara (IKBN) Miri Ke-16 sekaligus menyampaikan sijil kepada 226 graduan muda lepasan IKBN sebagai pengiktirafan di peringkat Sijil Lanjutan dan Sijil bertempat di IKBN Miri, Sarawak hari ini. Turut hadir, Timbalan Ketua Setiausaha (Strategik) Kementerian Belia dan Sukan, YBrs. Puan Ramona binti Mohd Razali.
2. Dalam ucapannya, YB Timbalan Menteri berkongsi keunikan latihan di Institut Latihan Kemahiran Belia dan Sukan (ILKBS) yang menggabungkan 80 peratus latihan kemahiran dan 20 peratus program pembangunan insan. Pendekatan ini dilihat mampu memperkukuhkan disiplin pelajar di samping mempersiapkan mereka untuk menghadapi cabaran masa hadapan yang semakin kompleks.
3. Belanjawan 2025 yang dibentangkan YAB Perdana Menteri Dato' Seri Anwar Ibrahim baru-baru ini membuktikan komitmen dan keseriusan Kerajaan Malaysia terhadap Pendidikan dan Latihan Teknikal dan Vokasional (TVET) apabila memperlihatkan peningkatan peruntukan daripada RM 6.8 bilion ringgit tahun 2024 kepada RM 7.5 bilion ringgit pada tahun 2025. Langkah ini bertujuan memastikan belia, terutama dari golongan rentan, mendapat akses kepada pendidikan berkualiti dan memperkukuhkan kerjasama dengan industri.

4. **“Graduan ILKBS: Menepati Keperluan Industri”** sekali lagi dikekalkan sebagai tema Konvokesyen ILKBS yang membuktikan komitmen berterusan untuk meningkatkan sinergi antara ILKBS dan industri. Pencapaian dua (2) graduan ILKBS yang mewakili Malaysia dalam pertandingan kemahiran peringkat dunia, *WorldSkills Competition 2024* di Lyon, Perancis membuktikan ILKBS mampu melahirkan graduan muda TVET yang bukan hanya cemerlang di peringkat Asia malah mampu bersaing di persada antarabangsa.

5. Menuju tahun 2030, seiring hasrat Kerajaan untuk meningkatkan tenaga kerja berkemahiran tinggi kepada 35% dalam sektor ekonomi negara, KBS terus komited menambah baik dan menawarkan kursus-kursus berkualiti seiring perubahan teknologi terkini untuk memastikan golongan belia lebih berdaya saing, relevan dan menepati keperluan industri. Usaha ini sejajar dengan Dasar Belia Malaysia (DBM) dan Model Pembangunan Belia Madani 2030 (MPBM2030).

**UNIT KOMUNIKASI KORPORAT
KEMENTERIAN BELIA DAN SUKAN**

26 Oktober 2024